



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu: Jullu 2012

Edisaun: 11 Jullu 2012

JSMP Enkoraja STAE ho CNE atu Kumpri sira nia Knaar Tuir Lei Define

Iha semana ne'e nia laran depois apuramentu distritál ba rezultadu eleisaun parlamentár, Sekretariadu Tékniku Administrasaun Eleitorál (STAE) no Komisaun Nasionál Elisaun (CNE) hamosu konfuzsaun ba públiku kona-ba akta apuramentu distritál ne'ebé apresenta ba CNE. Tuir CNE katak, akta sira ne'ebé apresenta ba CNE iha balun la-orjinál maibé fotokopia de'it, ne'e duni molok halo apuramentu nasional CNE ezije ba STAE atu hatama akta orjinál sira hotu hodi evita manipulasaun.

Tuir Diretór JSMP Luis de Oliveira Sampaio: *“konfuzsaun sira hanesan ne'e loloos la bele mosu, tanba knaar no kompeténsia órgaun eleitorál rua ne'e nian define klaru ona iha lei nú. 5/2006 no dekretu Governu nú. 2/2003. Tanba ne'e JSMP enkoraja instituisaun rua ne'e atu ezerse sira nia knaar tuir padraun legál sira ne'ebé eziste”*.

JSMP observa katak deklarasaun sira ne'ebé sai husi Prezidente CNE no Diretór Jerál STAE la refleta ba lei Nu. 6/2006, Art. 47 (1 no 3) kona-bá assembleia apuramentu distritál. Lei ne'e fó kompeténsia ba assembleia ne'e hodi halo reabertura ba kontajen de votus (apuramentu distritál), la'os ba STAE. Ne'e duni tuir loloos CNE ezije ba assembleia apuramentu distritál ne'ebé prezide diretamente husi membru CNE rasik hodi apresenta akta orjinál sira ne'e, la'os ezije ba STAE.

Entretantu, JSMP mós halo observasaun no analiza ba deklarasaun hosi Diretór Jerál STAE iha média katak *STAE la entrega akta orijinál sira ba CNE ho razaun atu evita manipulasaun hosi parte balun*. Nune'e mós deklarasaun sira husi koordinadór STAE distritu sira nian katak *akta orijinál sira ne'e rai hodi antesipa bainhira mosu reklamasaun ka keixa ruma ba tribunál, sira bele kaer ida orijinál ne'e hodi hatudu hanesan prova ida atu evita rekontajen ba votu* (Timor Post, 11/07/12).

Tuir JSMP nia observasaun, deklarasaun sira ne'e mós la refleta ba knaar no kompeténsia ne'ebé lei atribui ba STAE (Dekretu Gov. Nu. 2/2003 Art. 12.1 no Lei nu. 5/2006, Art. 12.2). STAE ninia knaar tuir lei sira ne'e mak hodi halo resenseamentu eleitorál, operasaun lojística no administrativa ba prosesu eleitorál no referendu.

Tuir Lei Nu. 6/2006, Art. 47, la'os kompeténsia STAE nian atu halo apuramentu distritál no elabora akta apuramentu distritál hodi submete ba CNE, maibé kompeténsia assembleia apuramentu distritál nian hodi halo apuramentu no elabora akta hodi entrega ba CNE atu bele halo apuramentu nasionál no foti dezisaun definitiva ba buletin votu nulu, reklamasaun ka protestu nomós elabora akta ba rezultadu apuramentu nasionál nian (Lei Nu. 6/2006, Art. 48.1 no 2). Ne'e mós kompete ba Supremu Tribunál Justisa (STJ) atu trata kona-ba reklamasaun ka keixa ne'ebé relasiona iregularidade sira ne'ebé mosu durante prosesu eleisaun no apuramentu tomak, la'os kompete ba STAE.

Ne'eduni JSMP rekomenda atu órgaun eleitorál rua ne'e la bele halo interferensia iha ezersísiu sira nia knaar ne'ebé lei define klaru ona atu nune'e bele evita konfuzaun no problema ba prosesu eleisaun tomak no kontajen votu.

Atu hetan informasaun kle'an favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Landline: 3323883